

權載之文集

開化圖書館

Kaishwa Library

開化圖書館

Kaishua library

開化圖書館

Kaichua library

開化圖書館

Kaichua library

權載之文集卷第二十一

唐權德輿字載之

墓誌銘

唐故幽州盧龍節度副大使知節度事管內支
度營田觀察處置押奚契丹兩番經畧盧龍
軍等使開府儀同三司檢校司徒兼中書令
幽州大都督府長史上柱國彭城郡王贈太
師劉公墓誌銘 并序

折木之下幽陵碣石融結網緼誕靈熊渾乃生元臣以
翼大君惟彭城郡王宣力三代撫封四紀在德宗朝纂

服舊勞以亞丞相得額征伐冬官夏卿再踐六職乃列
台宰乃居師長在順宗朝論道進律就加司空又拜司
徒今皇帝聰明齊聖褒厚功德擢侍中中書令綢繆樞
衡臨長諸侯元袞赤舄崇其物采九命二伯極其名器
勲猷備於贊書終始焯於代家五年秋七月寢疾薨于
莫州之廨舍享年五十四冬十一月歸全于涿州良鄉
縣之某原追錫太師不視朝三日命諫議大夫弔祠法
賻廷尉卿持節禮冊又詔宰臣德輿銘於壽堂所以加
恩報勞始終滲漏之澤也公姓劉氏諱濟字濟之蜀昭
烈皇帝二十一代孫曾祖宏遠皇檢校司衛卿臨洮軍

使襲彭城郡公贈宋州刺史祖貢皇特進右金吾衛大將軍贈揚州大都督父焯皇幽州盧龍節度觀察等使御史大夫贈司空恭公公承是覆露生而岐嶷深而通直而和宏毅忠肅端明溫重固已蘊絕人之姿挺希代之器始以門子橫經游京師有司擢上第叅幽州軍事轉兵曹掾歷范陽令考績皆爲府中最興元初以太子家令爲莫州刺史以御史中丞爲行軍司馬凡吏理之慰薦輿師之拊循如良庖之無肯綮良農之無滅裂司徒卽代有詔奪情節哀順變講信修睦先公之封畛盡在長帥之威惠畢舉比歲大旱蝻蝗爲災絜齊蔬韭默

以心禱甘雨祁祁嘉生萁萁因其豐登示以班制古諸
侯之令典靡不具焉貞元初烏桓誘北方之戎幸吾阻
饑大聳邊鄙公先計後戰陳兵於郊乃遣單車使者誘
掖教告繇是諸戎反爲公用幹不庭方厥猷茂焉明年
鮮卑墨乙之犯古漁陽其後啜利尅右北平公分命左
右軍異道並出然後以中堅衝擊士不離傷師不留行
梁入其阻抵青都山下捕斬首虜以二萬級獲橐駝馬
牛羊萬數十九年林胡率諸部雜衆侵滎于檀薊之北
公親統革車會九國室韋之師以討焉飲馬灤河之上
揚旌冷陁之北戎王棄其國遯去公署南部部落刺史爲

王而還登山斲石著北伐銘以見志自大山以東懷和
四隣或歸其天倫或復其地理謁急則解其顛沒居常
則納諸矩度兵興以來氣俗相因或以麥敗度或以美
沒禮比屋之人被縵胡而揮孟勞不知書術公乃修先
師祠堂選幼壯孝弟之倫春秋二仲行釋菜鄉飲酒之
禮生徒俎豆若在洙泗和門耽耽公署沉沉自從事掾
史迨紀綱之僕廩稍有倫采章不雜接士必下以詞氣
推賢而容其出處隴西李益樂安任公叔皆以賓介薦
延至郎吏二千石爲近臣良守此又烈丈夫大君子曠
度犖犖之爲也其於勤身裕物生聚教訓祁寒則頒以

絮帛大歉則振其倉廩一方之人蒙被惠和嘉祥交於
動植孝順浹於州壤美化周行無不及焉去年冬王師
問罪於常山公率先蹈厲累上功捷引義慷慨賦詩以
獻詔宰司序引百執事屬和以美大之師次瀛州旣圍
樂壽又遣支兵急攻安平三旬未暇武怒益奮命其子
總以騎士八千先登公親鼓之士皆殊死戰亭午而拔
誅屠無噍類蓋所以宣威制勝于可必也天子錫以寶
劍金甲彤弓旅矢方董諸侯之師將覆其巢俄感厲氣
隱机口占署總軍司馬曰無以吾故而稽天誅悉召戲
下以須王命俄而下霈然之詔宥罪班師加公寵渥已

至大病遺章悃欵不及家事天下之人偉其忠勞總以君命起於倚廬之中委董戎事由御史大夫爲工部尙書凡軍師之節制封部之廉察盡如恭公太師之命焉茹荼雪泣祇服丕矩以國僑之遺愛知公業之不亡生極榮號沒有愍策揚名以繼志善訓以克家君臣父子之道斯爲至矣紀大臣所以尊王命懿武事所以壯天聲敬摠馨香以識冥漠銘曰

帝在法宮推心懋功泱泱彭城秉義納忠幽都朔易賜履來宅便蕃渥命焜耀嘉績北戎病燕從古以然懷徠蕩定勇畧昭宣燮和之重公作霖雨師律之嚴公作齊

斧廓開禔診振奮虓武保大定功庇人尊主卻穀敦悅
乃主成師善經義府公實似之北伐刻銘西征賦詩播
於工歌列在鼎彝壯猷未極大暮如斯華首童牙辛酸
涕洟義方紹續君命吉祿孝在無改恩延必復參差輅
葆澶漫陵谷勒石下泉幽元照燭

唐故河中晉絳慈隰等州節度使支度營田觀
察處置等使開府儀同三司檢校太尉兼中
書令河中尹上柱國延德郡王食邑三千戶

贈太師張公墓誌銘

并序

元和五年冬十二月戊寅太尉兼中書令延德郡王自

河中來朝明年春二月景子發瘍薨于京師務本里第
春秋五十皇帝不視朝五日册贈太師冬十月乙酉歸
全于萬年縣少陵原嗣子檢校工部尙書兼右金吾衛
將軍克讓毀瘠號慕没于倚廬之中追命尙書右僕射
次子太僕少卿克恭檢校右散騎常侍駙馬都尉克禮
等泣遵理命用誠信襄事舉書公之大績大烈請刻石
以識云公諱茂昭字豐明其先燕人九代祖奇北齊右
北平太守因封其地代襲王爵違難出疆雄于北方曾
祖遜乙失活部落刺史祖謚皇開府儀同三司平州刺
史贈太子太傅父孝忠皇義武軍節度易定等州觀察

處置等使檢校司空同中書門下平章事上谷郡王贈
太師謚曰貞武惟公承太傅貞武之遺烈受嚴凝溫厚
之全性戴翼其代撫征其人戎容山立盛氣玉色英風
義聲燁耀光明調鼎七歲秉圭三覲爰立於明廷考終
於會朝卓爾拔乎倫類沛然滿乎觀聽凡異姓而王真
食其封於三公備司空司徒太尉之任於三師歷太子
太保太傅之秩累階宰職乃於中書令名器始終與勳
伐俱初公生當上元寶應之間天下兵興感激代故間
關力用始自掾曹宮衛以至卿寺臺閣金艾采飾祇庸
顯明寶臣物故成德不靖公以弱冠偏師破朝鮮於東

鹿禁旅急病薊人挺災公以中權衡擊脫西平於清苑
此其裕蠱宣力之章章者貞元七年貞武公薨于位朝
廷以公狎貫戎重可輯寧一方繇定州刺史起領留府
禮服外除策勲懋官統節制之師修方伯之職累丁趙
國魏國二太夫人憂喪祭情理一其哀敬凡三奪齊斬
以從王事孝文當陽考禮述職瞻斧扆於法座順宗繼
明保乂齊信執壤奠於翌室今上報本侍祠肅事奉圭
幣於泰壇至於浹洽邴魏優游平勃錯綜事典習通儀
制樹善於廟堂陳暮於穆清迴出功臣之表實行宰相
之事矣前年冬詔武庫禁兵會諸侯之師於常山分道

並出鹵帥絕太行越飛狐是日北道以公爲主於是創
廡置以闕礎陋悉芻米以給賦輿軍尉裨校待之滿志
供具宴餼無非加等亦旣壓境士皆賈餘公與羣帥屈
指環城有日矣恒人以步騎二萬踰木刀溝爲從衡七
里之陣來薄于城公擐甲出壁門徑當其鋒俾其子克
讓與猶子克儉甥陳楚等分掬之設左右翼以待之出
奇決命凡數十合取功於七縱蓄銳以三捷席勝鼓行
橫屍如陵方申盡敵之算俄奉班師之詔因喟然曰自
五十年間兩河多壘縣官以在宥含垢懷和萬方推恩
息人延代賜履或恃長轂且踰短垣至有相依若輔車

相求若市價雖有長智不能自還大丈夫亦當排雰雰
而翔慶霄出樊籠以徧閭闔行之自我仁遠乎哉姑請
軍司馬於朝使人狎其理然後以一方之地圖戶版三
軍之駟介伍符授焉子文告令尹之政士蔦傳太傅之
法拜章撰日盡室就途舉代得請然後有河內之命摩
幢纜至於理所劍履遽來於轂下沃心體國指掌論邊
慷慨行義涕洟交感方受面命以班詔條嶷然持重爲
守臣表率其或行不俟駕幹不庭方清昆夷掃獯狁然
後銷五兵爲農器驅一代爲壽域此公之心也噓夫以
析木之下將相代家按節股肱羣在諸侯王上而薦紳

文吏擁旄山東廉風俗於武旅之地修班制於戰爭之後是一舉也而二美行焉君子以爲元和理平之嘉瑞雖西漢之白麟黃龍不若也始公割符三年而分閩又四年而進律以州爲都府而爲長吏又七年而爲公明年作相最凡盛大幾三十年君臣極其感會天下仰其風采詔葬法賻率用汾陽王咸寧王故事所不至者歿於終身豈造於物者不與其全歟此吾所以當宁流慟而嘆其用之未極也夫人衛國夫人李氏滄州刺史兼御史中丞陵川郡王固烈之女閎閎慶祉淑明柔嘉由內外音徽以大凡所顧復皆爲善良克讓以勞而貴以

毀而歿克恭以才能歷卿士克禮以淑令儷夫人克禮
之季曰沙門宏信宏信之季曰太子舍人克從少府丞
克勤光祿丞克正等稟訓尙義執喪知禮閨門積厚名
教多之德輿久辱深知謬叅大政疇庸之命親奉聖墓
謨德之詞式藏厚載銘曰

太尉兵柄中書理本桓桓令君宣令分閩行旆搖搖馬
鳴蕭蕭華袞九命介圭三朝乃率賦輿乃頒詔條先台
諒闇零靈蔽晦詞極切劇義刑風槩皇明光宅績用章
大恒碣之間革車所會蹈厲策勳推授交代皇用疇庸
徧登三公毅然舉宗來自山東周有申伯漢稱竇融乃

陟其明于河之中行道有福爲仁由已哀榮思福冠耀
終始少陵爲谷幽宅在此中南如礪令聞不已刻銘泉
壚與天壤俱

唐故山南西道節度營田觀察處置等使開府

儀同三司檢校尙書左僕射同中書門下平

章事兼興元尹上柱國馮翊郡王贈太保嚴

公墓誌銘

并序

序曰陰陽和而萬物得君臣合而九功敘內竭忠力外
修班制匡載藩輔勤勞王家安危注意終始尊任明德
大烈爲信臣龜龍者其惟太保馮翊王乎太保諱震字

遐聞本馮翊人後徙家於梓潼曾祖豐皇劍州司馬大
父和本雙流縣尉贈遂州刺史仍代貞晦以至皇考審
綱天爵內充聘問不屈蓋君平湛冥之遺烈也四追命
至尚書左僕射公少有風節忠厚閱大學涉古今之變
器包王佐之畧三命官至合州刺史嚴黃門武時領方
任寘諸牙門副軍攘寇威望大著又三徙至太常卿秩
銀青光祿大夫黃門旣沒公亦居息常以智免不爲利
疚李僕射叔明之至也以前後功勞上聞起家拜渝州
刺史公曰李公中外之姻也今茲推遠無乃誘于私乎
義無所苟移疾罷去是歲遷鳳州刺史充本道節度副

使攝侍御司先是兵火未戢州壤蕭然庸亡斃踣數閭
無幾公乃剪其荆棘弔其傷痍毀家以佐軍約已以裕
人精力不懈視之如子未周月而四郊襁負感甚以泣
曰嚴公之仁父母不若也尋丁內憂詔復厥職充興鳳
兩州都團練使血涕拜章三上不允就加殿中侍御史
至于御史中丞爵馮翊郡公進封鄖國偕極儀合賞亦
推恩居部十四年考課爲天下最教訓盡其物宜編人
有以質理之詞據其肝膈刻巖石而頌公者雖古之善
頌不能加焉建中三年陟報政之尤修連帥之職拜梁
州刺史御史大夫山南西南節度觀察等使後二歲皇

帝以避狄之亂狩于是邦加戶部尙書馮翊郡王公以
漢中形束壤制邇於京師陳蕃主斷咫尺三接清蹕旣
駐皇心乃夷大僚法從儲峙肅給事不乏于上人不勞
於下於是師期四合士氣百倍神武陰隲諸侯鼓行丹
水卽戎乃申恢復之畧塗山執玉克備聲明之禮夏六
月詔梁州爲興元府公爲尹遷尙書左僕射真食二百
室其於先事備戒贏糧積甲北達于駱谷成功翼從除
道執勒西至于散關屬車以安重險斯濟明智一德合
于宸衷仍歲來朝命賜備厚温室晏見圓邱侍祠事業
焯於功令形容繪於麟閣時所難能而公沛然常以同

谷陰平備邊要害乃建堡壘新廩庾禦寇有金湯之固
焉積粟有水火之饒焉出與師以會漢南之討而人不
知役操量鼓以濟中都之歉而敏必有程盡慮以幹王
事多方以佐百姓而又精于鑒裁敏于推擇能樹善于
幕庭終翰飛于公朝率由慰薦而後光大至於爲宗工
近臣賢大夫良二千石者列於中外書曰慎柬乃僚又
曰峻人用章惟公有焉貞元十二年同中書門下平章
事崇德報功于是乎在純誠積戀亟請朝謁上以一方
戎重優詔止之十六年六月癸巳感疾薨于理所春秋
七十六追贈太保廢朝三日弔祠法賻率有加數乃有

兵符命書授公從祖弟代之才既得于官下恩實彰于
身後及輜車之至也又詔有司備禮冊命以其年十月
丁酉葬于長安縣居安鄉某之原前夫人武功郡夫人
蘇氏劍州長史束之之女繼夫人沂國夫人王氏試左
千牛衛長史舟之女咸其柔德以宜家道長子戡河中
府士曹叅軍次子協殿中侍御史劍南西川節度推官
嗣子公弼以文學克家仕至國子監主簿以似續疏土
封會稽縣男幼子公貺亦以修詞爲州黨所薦祇服義
方綽綽有裕哀敬誠信之禮備焉初公從父兄侁以舍
章好義歷中執法剖符廬山同氣曰堅曰霽曰霍皆卿

才也堅爲盛山咸安二郡守霽以殿中侍御史介于岷
峨霽四爲尙書郎猶子子聳雅皆用文雅筮仕有名於
時信乎致義貽訓知人之全也弼以德輿職忝司言知
大臣之功行捧持官簿哀托名篆是用論次藏諸九原
銘曰憲憲馮翊平康正直柔嘉強毅允是三德端誠啟
迪有大勲力河池理平物遂其生漢中經武人悅是舉
智能扞患忠以衛主謀猷旣臧翼戴以功黃道捧日卿
雲從童梁山斯峻碩德斯鎮琬戈金鉉戎輅相印時惟
元老克叶昌運方壯其猷天胡不憇塗芻卽遠金石傳
信作銘元堂永識休問

權載之文集卷第二十二

唐權德輿字載之

墓誌銘

唐故金紫光祿大夫檢校司空兼尚書左僕射
同中書門下平章事上柱國魏國公贈太傅賈
公墓誌銘 并序

德宗皇帝享國二十有七年注意於將相之臣惟魏國
賈公諱耽字敦詩始則四握兵符保釐節制終乃再踐
師長燮和樞極文武致用億寧斯人景鐘書代金鼎和
味咸有一德用平泰階奉綴衣之詔公已感疾先復土

之期公乃捐館屬者太上皇帝重公者碩進加司空今
皇帝憫公徽懿追命太傅春秋七十六佩相印十三年
前史稱賈生通達國體其孫嘉好學世其家其曾孫捐
之建義深切漢元帝爲之罷朱崖郡皆先古之有議論
風節者也曾王父遠則皇長河尉生王父和義沁源主
簿贈揚州大都督生烈考琰之燕居不仕贈尙書左僕
射皆代德之安貞延耀者也公中正仁恕極深研幾究
古今于百氏窮地域于九譯乾元初寰海未靜褐衣危
言始尉太平連辟大鹵二入御史府再爲尙書郎亞尹
北都剖符西河嘉猷循行所莅居最大厯十四年冬十

一月繇大鴻臚貞師於梁叶力羣帥平夷江漢青綬大
封咄赫光明進叅六職節制襄峴載會兵車撫征淮右
徵謁行宮真拜冬官明年以三后之任分正有洛加地
進律察廉唐鄧復摠賦輿鎮于靈昌政成八稔愷悌清
淨於是膺審象之寄贊格天之業中外受授服勞王家
易坤之說曰地道也臣道也惟公有博載之量露生庶
物書洪範之說曰疆弗友剛克燮友柔克惟公推寬信
之誠弼亮時化故其撫封也不尙禁厲不施皦察扶導
善氣折銷未萌使貪者讓躁者靜四鄰敬之如神明闔
境愛之如父母其作相也當先皇帝洪覆陰隲財成造

化宗工雋老但以忠厚承清光故公之陽休德輝涵泳
無際靄然和平之運怡然簡易之道至若匪躬詭詞勞
謙不伐者亦何可勝言坦易而周密廣大而潔淨聳然
虛已求天下之才博聞強識通天下之志斯不可及已
所著梁懷王傳碑先君子碑陳祖德以自况載家聲于
可久體要閱達邁乎羣倫撰海內華夷圖及論次地理
之書凡五十有五編貢在中禁傳於域內言方志者以
公名家被病經時屏絕鑿術且曰吾以忠信爲口禱苑
生爲天理一氣聚散斯焉順之美櫝壽堂自爲終制墮
然委化以啟手足雖從古知命之士所難能焉夫人武

功蘇氏駕部郎中守忠之曾孫處士珣之女有柔儀淑
行歿于中身二十五年矣嗣子疇太常丞協律郎早夭
次子麟太子司議郎少子晬京兆府叅軍事馴行孝謹
號吽毀瘠奉二尊裳帷合於九原刻茲樂石以永終古
銘曰麟之儀儀鳳之師師有倬魏公發舒清時外總方
國掃除螟螣入居公台左右皇極於學無不通於士無
不容穆如龢風叩如華鍾偉材闕議信以發志中行循
性其道易易始初清明紀號永貞惟陽月之朔日兮返
智氣於冥冥下甸逮半兮祖載于庭神休古原兮闕此
音聲前直國門兮旁邇梁傅不忝本兮公之素笳簫啟

路歸此壤樹嗚呼有唐元老兮魏公之墓

唐故金紫光祿大夫守太保致仕贈太傅岐國

公杜公墓誌銘

并序

有唐元老太保岐公諱佑字君卿年七十八以得謝之
歲歲十一月辛未啓手足于京師安仁里皇帝恤然不
視朝三日冊贈太傅弔祠加恩明年夏四月乙酉返真
宅于少陵原大墓公之先自漢建平侯晉當陽侯而下
忠賢輩出積厚昌大以至曾王父行敏皇銀青光祿大
夫荆益二州大都督府長史南陽郡公王父愨皇中散
大夫尚書右司員外郎詳定學士父希望皇銀青光祿

大夫鴻臚卿恒州刺史西河郡太守飾終三加至尙書
左僕射公總中龢之精靈蹈明哲之大方體仁以長人
厚德以載物器周代資材爲國華程功績事博達宏裕
在元宗朝以門子筮仕解巾有聲在肅宗朝以郡掾廷
吏賢侯交辟俄以臺郎御史二千石事代宗以六職之
二十聯之重兵符相印事德宗初自度支郎歲中拜小
司徒時當躡急政有均節持權者排陷改蘇饒二州刺
史以亞丞相顓征南方入居左轄出典陝服旋委節旄
貞師淮海凡居鎮十五年厯禮刑二尙書乃進左揆燮
和大政拜章來朝兼理公台綢繆樞極在帝左右順宗

諒闇公攝冢宰因山復土專護其任進掌五教乃平九
賦永貞內禪公奉典策今上繼明真授司徒備物采飾
褒優章灼推致四時之和茂明萬物之宜初公來朝之
明明年及懸車抗章告老三上不允厥後詔公每旬一
朝訪決重務以公年與德耆尊老不名後八歲天子憫
煩公以官職之事恩遂堅請禮優師臣大雅稱方叔元
老且非宰政東漢之胡公中庸不理藩服曷若公都將
相之重兼文武之全三代論道兩朝總已披搢紳者凡
六十年致仕就第極其榮號嚮用五福闇然得之在臨
川有愷悌之化泣南海有威懷之畧自淮而南興事任

力三邦之人類其聲詩炳如嵩華刻在金石公旣當安
危注意之重一人倚愛急宣密啓多所交感嘉保太平
承寧諸侯或洒其煩言或導其善氣損怨服義日用不
知至有執介圭朝象魏冠功臣之表近天子之光爲時
龜龍公所樞極喜士容物羣而不黨理遣情恕犯而不
按一言定交生死以之趨人之急惟恐不及不徼福不
乞靈物恠氣啖不接于心術誠明坦蕩自得于天理中
正之外無自入焉國門南出杜陵故地畎清流疏灌叢
觴斝引滿金石合奏時賢雋人結轍在門極謝安之林
墅異陸賈之裝橐鄉耆時會鷗鳥不驚又以見公放懷

推仁無不逮也至若閱天下之義理究先王之法志著
通典二百篇誕章閎議錯綜今古經代立言之旨備焉
凡推轂多士繇幕廷而奮迅者近於百輩將相六職左
右曹臺以至列藩二千石不可勝書夫人安定郡梁氏
蘇州常熟縣令幼睦之女也專柔淑慎動有儀矩先於
公歿幾三十年矣嗣子司農少卿師損與其弟昭應縣
令式方駕部員外郎從郁等皆以材能孝謹爲卿大夫
元士推擇之際以吏資蔭庠之下有淑聲儼然摧剝相
視無怙誠信愛敬實加于人以德輿嘗忝府辟晚聯台
座每荷同升之義盍陳無愧之辭直書德輝以鏤幽礎

銘曰

君子之用可以大受斤斤岐公祇事三后暮明盛時其道甚夷乃將乃相乃公乃師六符齎平五福叢滋齊之溫良商之慈愛推本性術發舒光大宣力中外勤勞翼戴懸車乞身知進知退歲在大梁月生一陽以佚以息忽乎茫茫厥襁納書禮優職喪智氣在上昭明發揚少陵鬱鬱著蔡叶吉宰木號風虞泉落日吁嗟岐公居此室

唐故中大夫守尚書工部侍郎兼御史大夫史館修撰上柱國賜紫金魚袋充弔贈吐番使贈

禮部尙書張公墓誌銘 并序

有唐博物通理之君子常山張君諱薦字孝舉以小司空亞丞相將大君之命結絕域之成貞元甲申歲夏六月出車國門在途被病秋七月戊寅復左轂于青海之西其孤敦簡與軍吏章騎護轎車而東明年春三月至于京師天子憫然加恩追崇太宗伯俾尙書郎弔祠職喪法賻秋七月癸酉安宅于某原君之先漢常山景王耳之後也曾王父義皇澤州治中王父文成司門員外郎贈國子司業烈考不忒揚州天長縣令贈睦州刺史代名儒學至君章大七歲善屬詩十歲通太史公書未

弱冠有令聲于江湖間優遊恬智博貫古今約已求志
視苟進如探湯東諸侯表其材以聞廷命左右禦率府
兵曹參軍尋以傳車徵加史館修撰以勞授陽翟縣尉
朝廷難諷議禮文之任拜左拾遺換太常博士東求儻
茂遷工部員外郎轉郎中修保氏之職擢左諫議大夫
爲權倖者所侵改秘書少監用久次升爲秘書監前年
戎王發導譯請棄細故以休寧西方先皇帝思所以臨
存卽敘故有冬官南臺之拜自筮仕至沒身與載筆終
始書盛聖一王之法考周禮魯史修明褒貶好古者謂
君辨裁而直其爲禮官講貫洽聞統同辨異之大乖疑

隱微之旨皆折中於君而優爲之貞元郊祀告類報本
再以臺郎攝贊大儀知禮者謂之閔達而敏使節法冠
從古所難始則內廷參侍出疆命介次則專席委重登
車有光減邊貢之蹄轍紓齊人之杼軸四牡所履陰方
洽驩及是以撫和憬俗非君莫可竟以靡盬終于絕漠
感慨者謂君盡瘁而忠凡歷十官而八在歷其他三帖
職二承攝一追命春秋六十一君子之道有初有終悲
夫惟君端直廉正醇醲博厚儼若彝器中涵靈龜以庸
制祿故不至隱約以道藩身故不至燠灼中立大朝爲
名卿碩儒和而不同直而不詐東陽之長者富平之默

識繫君有焉初興元貞元之間轂下饑旱乘輿避正殿
君引古抗章條其日數詳定昭德皇后廟樂及太儀位
號儀大臣祔廟鼓吹之法皆稱典義而爲故事有文集
三十卷犖犖然君子之詞也上疏陳史職利弊指明切
寔有裨王度著史遁先生傳臣節之貞厲見焉纂十祖
贊家風之德善章焉至若宰輔傳畧靈恠集同僚籍寓
居錄等又數十編自成一家之言初娶太原鄔氏某官
之女也繼室安平郡陳氏某官某之女柔嘉有儀而賦
命不稱嗣子敦靖爲宮衛紀綱掾次曰敦簡叅鄭州軍
事次曰敦業敦謙敦紹等克家孝謹執禮哀敬以德輿

再同玉堂金華之署承先子之歡里仁服義爲日固久
泣狀遺懿以表識爲請是用舉其大而畧其細銘諸墓
門其詞曰

天下圭表繫乎史職印印冬官二紀良直王者惠澤先
於遠人皇皇使軒三抵殊鄰禮以節事每馳極摯文以
導誠克諧雅聲思若雲鬱心猶砥平懷黃刻采兮寔稱
其服志力方壯兮奄然不淑有生必化兮邃古同塗憫
君轉祫兮來自外區難也收子兮故人刻石湛恩襚印
兮賁此幽窆

唐故銀青光祿大夫守吏部尚書兼御史大夫

充諸道鹽鐵轉運等使上柱國趙郡開國公贈

尚書右僕射李公墓誌銘

并序

維元和四年夏五月丁卯冢宰趙郡公與寢疾薨于永
崇里享年六十三天子憫然不視朝追命右僕射冬十
月乙酉返葬于洛師緱氏縣芝田鄉之大墓公字令淑
趙郡贊皇人曾祖知讓皇河南府長水縣主簿祖承允
江州別駕贈太府少卿父疑右武衛錄事參軍飾終四
加至尚書右僕射代載德善至公昌大始以經明筮仕
爲華州參軍試言超絕補鄠縣尉登朝爲監察御史殿
中侍御史由美原縣令課最爲刑部員外郎由萬年縣

爲給事中以御史中丞領潭州刺史湖南觀察使就加
右散騎常侍領洪州刺史江南觀察使就加御史大夫
由二府報政入爲兵部侍郎在途加度支鹽鐵轉運副
使至止踰月代今司徒岐公爲使明年遷兵部尙書間
一歲轉吏部尙書總八柄平九賦左右理道以紓元元
天子方推心竦意倚以爲相奄然大病斯可痛已公溫
重方嚴愷悌忠清得洪範之正直大雅之明哲強志特
立爲儒門吏師中臺草議左曹還詔法程之下無尤違
分畫之下無奇表其爲二方修班制建長利布以休鱗
樹之風聲大凡都府歲杪使刻深吏周行支郡鉤撫泉

貨二千石不相聊如桎奉然公則分命部從事覽觀禮
俗問人疾苦廉吏善否而已至有經用之羨使郡自爲
理得以蠲乏困補庸亡府無私焉四履之內遇凶旱水
溢損有餘以均不足農里無大乏官司無宿憂引邦鄉
碩生勤學講藝導彼輕惰率循教化皆有聲詩揭于康
莊其制國用也調盈虛御輕重阜齊人之業而地不加
賦偉公家之急而利無所濞先是池澤之稅因緣爲奸
牢盆以私幣貨滯濫公則去一朝之便質終歲之成變
其苦窳以寬物力盈入之數不可勝條上嗣位之歲發
武庫禁兵以誅劉闢三蜀之饋不乏於軍千金之費不

征于人揚天聲於井絡斷戎首於齊斧是皆謀猷大績
經理大本豈止于漢廷桑大夫耿中丞區區然商功利
析秋毫而已哉其爲天官已嬰寢患猶與郎吏切劘奏
書去繳繞之科禁絕私回於肯吏士之多調者多受賜
焉內外掃之際精爽不亂與上介言職業雖康寧晏間
之不若君子以爲難自解巾褐至捐館舍凡歷十六官
利刃所觸大車所載文理聰明卓冠出倫規爲密靜矩
度章灼大吏之所表的諸公之嚴重其文采英精實循
道體要不爲曼辭其術學博浹折中定疑而不理章句
嘉士尊賢開懷盍簪絲桐博奕談笑喁喁每有餘裕而

無留事志在端正百度儀型四方以暮明宏濟爲已任
而績用未久斯吾君所以當宁流嘆而衆君子失聲怛
化豈虛也哉凡三合姓初曰范陽盧夫人太子賓客幼
平之女次京兆韋氏二夫人潁州刺史允洎膳部員外
郎襄之女以從祖妹而繼室焉皆以華腴淑哲不幸凋
落長子紹左衛兵曹參軍鳳翔節度巡官專謹有馴行
嗣子繼京兆府參軍節躬強學幼子紵編皆以門蔭在
仕次紹繼等泣次先公官簿事業請書墓石且以理命
見托故不得讓焉銘曰
大行之東全趙古風鍾懿美兮左車武毅元禮文事叢

慶祉兮天官冢卿莊重廉清大君子兮精金斷割良玉
特達視所履兮表率二邦鰥孤惠康斯樂只兮切齊八
政底慎徽令有經紀兮宜登上台以賦羣才命造已兮
緱原厚地追琢欵識神在此兮

開化圖
kashua

權載之文集卷第二十三

唐權德輿字載之

墓誌銘

唐故太常卿贈刑部尙書韋公墓誌銘

并序

維貞元十七年秋七月乙酉太常韋公諱渠卒年五十
三啟手足于靖恭里戊子詔書以大司寇印綬告第其
孤博古近古等號咷崩慕以冬十一月甲子著與蔡叶
告窆于某原其徽數用天子之追命其誠儉用先人之
理命旣而纘書出處之義行官業請斲圓石藏于塋內
云公字某京兆杜陵人自楚元王傅漢丞相節侯恭侯

而下其族盛大天爵人爵沛然兩集六代祖範隨郿城
莊公會祖餘慶皇坊州刺史祖景駿房州刺史父冰著
作郎兼蘇州司馬同氣齊名皆以文學論著爲賢卿大
夫而著作志氣閎邁落落有奇節公卽第若干子也年
十二善賦詩屬書未弱冠博極今古尤精史藉力行過
人且以爲夫子在魯則衣縫掖在宋則冠章甫范蠡在
陶爲朱公在齊爲鴟夷子皮於是傳心印之法於金陵
授谷神之道于華陽或爲塵外人或爲遺名子其達觀
也不名一行其元同也會歸三教蓋周流揭厲無入而
不自得焉終以儒服服素王之道大厯末丁著作府君

憂倚廬于壤樹之側以純孝感嘉生廉車列上州閭聳
敬貞元二年起家拜校書郎五年轉左武衛騎曹掾皆
爲知己者從事八年大成均表其名經可領學徒遷四
門博士十二年夏承詔與近臣名儒緇黃大士講議于
麟德殿上以爲能拜秘書郎尋獻詩七百字極其文采
歲中厯右補闕左諫議大夫再當言責之地切劘獻替
數進熟于君規事建議颺起鋒出卓犖頡頏取重於時
三接日旰公卿仰其風采薦巖穴有道之士以待兩言
其他推轂皆一言感槩就義若渴見不善如探湯與夫
陰拱自愛持容容之計者固爲愈矣間一歲遷太府卿

錫以命服又間一歲遷太常卿泉藏受用之法緜蕝禮
文之事峻科禁以絕其私酌儀制而合于中被病乞告
禮愈優而不得請壽與志皆未極而歿悲夫公敏於歌
詩縟采綺合大凡文集若干卷撰莊子會釋老子金剛
經釋文孝經維摩經疏三教會宗圖共十餘萬言又奏
修貞元新集開元後禮二十卷詔下有司令行于代當
其憫坐馳哀弱喪也泛然若不滄於物及披肝膽承顧
問也毅然若不有其身起儒官博士十三四年踐文石
登玉堂赤車金印燠灼中外其所以得之者無他腸故
也禮器曰觀其發而知其人之智洪範曰俊民用章噫

嗜太常之道其智而俊歟雅爲晉國韓公魯郡顏公之
所薦寵魯公嘗稱遺名子洞徹三教讀佛書儒書道書
向三萬卷又多言其神奇之跡今茲不書姑書其章明
宏大者用識窳窳一以申嘗僚之義一以遂孝子之心
其銘曰

儒有奉常兮旁觀三元強志敏心兮詞義紛綸初委約
以卷懷終發舒而顯尊出四門兮登三閣居保氏兮諤
諤開知囊以當法座印纍纍而綬若若天衢凌厲兮才
較群艾服官政兮年中身感截道兮駟過隙夫何一炷
聚散之沄沄逝者固不可作兮鏤貞堅于墓門

唐故朝議大夫太子右庶子上柱國賜紫金魚

袋韋君墓誌銘

并序

君諱聿字某京兆杜陵人六代祖郿城莊公範有勳力
於周隋間範之孫機實居大農艱貞忠厚書在國史機
之孫贈太子少保岳八子爲二千石皆有風績生贈太
子太師賁仕至藍田尉清方粹遠天爵自修有才子四
人君爲冢嗣承少保太師祖禰之慶故延耀發舒于君
伯仲之間少開敏有才智通覽書記不爲章句儒天寶
中以門子奉清廟齋祠試言會府補宣州南陵尉歷揚
州天長丞越州兵曹掾涇原節將表爲叅軍以廷尉平

攝監察御史未及行授揚州錄事參軍尋爲本府薦拜
秘書郎兼殿中侍御史以官名心瞿換太子司議郎俄
擢侍御史檢校祠部員外郎皆爲淮南從事貞元十二
年徵爲水部員外轉比部郎中德宗召見賜以金紫命
服俄遷衛尉少卿國子司業用久次拜右庶子元和三
年九月景戍以官壽歿于長興里春秋七十五君初筮
仕已辯疑摘伏全活枉濫厥後率爲守臣薦引歷丞史
紀綱塚皆以理効聞自簪法冠贊戎重或筦府政以修
吏理若摻籛鍾而揮孟勞度音觸物非輩類所及所奉
之主卽故居守杜扶風公今司徒岐公其人也介弟太

尉南康忠武王有大烈于王家同氣致美士林景行不
乘勢以燠灼每虛懷而坦蕩再爲尙書郎業以修計部
稽百事財用之數嘗欲覆視禁軍董正其簿書雖事適
中止而聞者竦嘆洎佐師氏相東朝克詳憲令以中宜
適朝請休沐或近郊考勝漢廷臣賢士大夫車常接轂
必醜酒理具懽怡晏晏交有久要而言無瑕謫平夷疏達
造適遺累有君子之槩焉與夫拘攣枯槁局束于一代
者異日論也素強力無疹痲奄忽啟手足庸詎知非五
福之康寧以考終命耶岐公以元老總國柄每退朝清
問日與君晏言一旦相失涕洟怛化夫人滎陽縣君鄭

氏某官某之女淑溫仁順爲六姻法凡合體若干年先
於君歿者半歲嗣子行檢進士第自協律郎移朗州司
戶有文業爲素藝器幹次子業行修皆修詞與計偕次
某等顓經術某等尙幼女子有行者四人在襁抱者三
人子壻某官某某官某等皆華宗良幹匍匐會事行檢
等令龜揲著得十月某甲子吉以德輿同辟公府周知
所履將琢圓石見咨直書銘曰

桂陽之系郿城之裔伊上族兮亞于大僚相彼東朝介
豐福兮吉凶糾纏以息口口斯不淑兮直城南偏卽遠
歸全覆夏屋兮茲焉追琢以識冥漠表陵谷兮

唐故大中大夫守太子賓客上柱國襄陽縣開

國男賜紫金魚袋羅公墓誌銘

并序

公諱珣其先會稽人蜀廣漢太守蒙晉西鄂節侯憲給事中龔皆以茂績焯於前載曾祖彥榮皇同州長史祖思崇韶睦常三州刺史父懷操桂州興安縣令贈華州刺史實有清行藏於家牒公早孤貧篤志好學舅氏徐吏部浩器以遠大以其兄之子妻之寶應初上書言事廷命太祝由吏資轉長水河南二縣尉萬年主簿分董計司湘中之賦授大理司直嗣曹王以宗室吏師節制洪荆襄三府公皆贊其師律歷監察御史殿中侍御史

祠部員外郎府除徵爲奉天令刺盧壽二州就加御史
中丞入爲司農卿京兆尹移疾乞告改太子賓客凡蒞
十六官考績四十四年宏厚有局度辨論通吏事敏而
文忠而能力緣飾楨幹所居可紀初結綬滿歲調於有
司會舅氏居選部上其名於宰府試言二篇比興菁華
及賓曹邨兼管書奏下安陸應山露布於朝矢石雨下
含章迅發介漢南也武人因府喪以刦軍寔壽張無狀
公立斬首惡十餘曹且命環棘於廷俾投所取以贖罪
間一日而金幣皆復微公之才則一方幾亂其宰陵邑
內官劾午吏有因緣橫猾以犯禁者榜笞至死人用知

懼凡田里之闕庸亡之徠皆倍于始至而不書於籍廬
江劇部號爲難理強家占田而寡人無告鄉校廢落而
冗吏猥多被病者捨醫事求淫祀公皆去其弊而圖其
利人人得盡四支之敏而務十全之術修起經師弟子
以理庠塾每歲以廉茂計偕者倍於他邦化條簡易和
氣浹洽靈芝產白雀至連率今司徒岐公上其理狀詔
錫紫金命服壽陽與蔡人接壤有州師萬數天子命中
貴人監理視方任焉訓武備飭文事嚴重廉清理行第
一入以材能爲九卿典司金穀由朱邑之課第循牟融
之事任其尹京穀不施鉤距嘗請減縣內平糴之半且

以嘗賦輸於公上者充焉精力惠養人蒙其利前史稱
吏不廉平則理道衰旋觀夫人之所泣有以見朝廷理
道之所繇也年者疹痍乃喟然曰吾以澤國書生累至
二千石居大農內史止足休老其在茲乎拜章數上雖
處以儲賓優秩而不得謝以元和四年冬十一月啟手
足於宣平里之私第逾懸車者四歲夫人東海徐氏同
州司馬參軍浚之息女婦道柔正不躋偕老嗣子讓卿
舉進士博學宏詞能直言極諫三登甲科爲校書郎咸
陽縣尉毀瘠孺慕如不欲生號奉輜車以某月日歸祔
于會稽之兆域以德輿與公同服大僚頃歲奉行中執

法之詔又嘗讀亡友楊懋公刻金石遺愛之說公之率履固爲周知識諸窀窆不敢辭也銘曰

懿彼君子兮有猷有守其心不回兮其進不苟中外賦政兮人之父母金艾被體兮華纓耀首月在子兮歲居丑復東榮兮寢北牖火黻列兮纁元紐歸鮮原兮巾廣柳邱夷谷變兮何不有追琢貞堅兮天地久

唐故朝散大夫守秘書少監致仕周君墓誌銘

并序

君諱渭字兆師其先汝南人六代祖衡仕隋爲淮陰郡司馬子孫因家焉曾祖頂口杭州長史祖守則婺州金

華丞父隨州棗陽令三葉沉晦纓韞未華皆以義行稱
於州里君服儒篤學工爲詞賦大厯末常潘繼居小宗
伯號爲得士君與令弟澈聯中正鵠于二有司之下是
歲孝文帝嗣大統詳延諸生又以貞師伐謀對有明法
授汝州襄城尉時太傅崔文貞公以匪躬當國兼綜書
殿表爲校理厯富平長安尉拜監察御史董選補于南
方南方吏理清而風俗阜抑君是賴復命其勞轉殿中
侍御史平理詔獄清公不苛遷膳部員外郎祠部郎中
典曹草議遵道循性居太微積星之位十年不徙官其
有據利權大竇燠灼於時者君必畏而遠之居易自是

前歲凶旱詔罷郡國選舉慮穀下艱食之不給也君抗
疏以爲無肆眚且久得非濫刑失職者含冤以罄和氣
邪臣以爲答于天戒者在此不在彼雖留中不下而士
友多之上皇踐阼章敘時儁君已感疾拜章請老有詔
授秘書少監以優遂之先築室于崇德里有嘉樹修竹
休沐吟咏以文自娛每得一佳句如獲官祿恬于進取
用此故也赤紱華髮燕居考詳方書精神以順和理永
貞元年冬十一月甲戌奄然大病以啟手足春秋六十
六夫人河東薛氏將作監丞腴公之女雅有儀操有子
三人從魯從禮從質克稟風訓以明年二月某甲子號

奉裳帷返葬于緱山縣唐興鄉之北原刻石銘墓以昭
景行銘曰

猗歟周君探六義思無邪詞頗類安久次復郎吏謝浮
榮佐中秘洛師緱原潛厚地刻勒貞珉書此誌

唐故正議大夫衛尉少卿聞喜縣開國伯賜紫

金魚袋裴君墓誌銘

并序

君諱會字某河南聞喜人有唐元老左僕射贈司空貞
孝公之元子惟司空左右肅宗壽與位侔百順五福宜
鍾厥後雖不能嗣居公相者必用攸好德考終命焉君
孝悌睦友慎厚敬讓直而和柔而不犯馴行克家學古

入官乾元初筮仕太常授奉禮郎再轉至主簿廣德初以宰相子行修飾特加正議大夫累登東朝爲中舍人率更令仍副少府又貳殿中今司徒北平王之節制河東也表爲戎左檢校吏部郎中貞元元年旱蝗相乘列郡災耗君奉府檄莅于定襄勞徠安集有異等之効就加金印紫綬以疇其能五年從北平朝京師真拜膳部郎中八年轉衛尉少卿九年戊申終于位享年四十六噫嘻君有甘白之姿而受采和有惠穌之量而蒙覆露徊翔省寺周旋官業質於典憲故不踰詳於奏議而有章盡齊敬於宗廟惇愷悌於族屬以友輔仁以酒全神

忘懷久次未嘗諂黷雖不踐右職立章章之效而厯官
十一列爵故里辟三公府以政事稱被薦紳奉朝請者
逾二十年無過言無違德啟其手足歸全於先公君子
以爲難再娶皆博陵崔氏前夫人新繁令平之女繼夫
人大理評事陽元之女咸有婦順不幸早夭其孤曰定
爲左千牛備身定弟密密弟字年甫成童咨於叔父前
京兆府戶曹向以十月某日返葬于東周萬安山之南
原二夫人祔焉孝子悌弟用誠信襄事禮文家法率履
無違言世功冠族者以裴氏爲河東盛閥自魏翼州刺
史徽種德滋大纂承紹續十有二葉至贈中書舍人義

宏仕至梓州元武丞君之大王父也舍人生贈司空倦
歷給事中杭鄧二州刺史君之王父也門業風緒天下
稱之今纂書其畧刻于基石銘曰

濟濟德門溫溫恭人司空之子司徒之賓位止亞卿年
不中身遽歸其全乃返乎真上有宰樹兮下有野土閔
此幽宅兮萬安之下

關化
kuanhua

權載之文集卷第二十四

唐權德輿字載之

墓誌銘

唐故金紫光祿大夫檢校禮部尚書使持節都督廣州諸軍事兼廣州刺史御史大夫充嶺南節度支度營田觀察處置本管經畧等使東海郡開國公贈太子少保徐公墓誌銘

并序

公諱申字維降東海鄒人五代祖周宣州刺史瓌瓌生隨江州司馬晏晏生吉州太和丞仁澈仁澈生皇吏部郎中諫議大夫元之元之生公烈考汾州司戶參軍贈

信州刺史大凡自偃王而下用仁義世其家諫議之文
行信州之廉退及公始大永泰初當著作賈常侍至操
柄儀曹舉士林之菁華進士上第調補秘書正字四征
翹車相屬于途望公舉趾以爲重九江而西服嶺而南
與朔寒被邊之地聯爲命介歷大理評事司直監察御
史太子司議郎殿中侍御史錫以章綬冀國路公之誅
哥舒晃也公以從事主謀居多嗣曹王之守鍾陵而誅
李希烈也公以長史行刺史事調州師以護饗道厥勞
茂焉江漢旣清拜韶州刺史先是長史不任職官曹弛
廢刺史寓於理下邑之令丞與編人雜處比屋庸亡公

田爲蕪公乃假之耕牛賦與種食人人自占視其力而爲之制歲乃善熟積爲倉箱於是計徒庸程日力作爲城寺大治垣屋廡置市列道橋器用皆備焉罷去之日夫家名數倍差於始至而不書于籍邑子張捷等五百人獻其理狀得請於觀察府以函奏書請立碑祠公瞿然止之曰此刺史職耳一旦上聞與沾伐者何異所不忍爲也府不能奪改合州刺史以先濮陽郡太夫人兆域未祔表求改葬總麻旣除以御史中丞領景州刺史自兵興四十年山東諸侯率強大驕蹇郡二千石多自命於轅門蓋縣官息人舍垢而因緣漸漬然也至是朝

廷以滄州負海勁兵處乃建節將幕庭裂屬城以置支
郡會其帥亦請缺守於朝朝論難之二府比推擇未稱
因召公入見而面命焉錫命服文馬緡錢五十萬尋加
節度副使中朝之條職憲令始被于景人是歲節度使
來朝既從父兄爲代表公以本官爲軍司馬陳情去職
徵還京師復以御史中丞出莅邕州領經畧之任開南
蠻徼道宣明威信種人黃氏納質請命化條風行獷俗
以清明年中貴人持兵符詔書至部以御史大夫督南
海二十一州軍事而節制焉前此守臣物故軍吏乘變
竊發印符易置部校拔用惡少年百輩軍中幾亂相率

亡命公既至捕誅首惡悉原諸誅誤者夷越負險阻白
晝攻剽芟夷根株使無遺類然後布以寬大人安作業
溟漲之外巨賈萬艦通岸南金充物狎至天子之恩澤
賜予聲明物采皆待焉上應急宣以馳疾傳下無強賈
用絕奸利和輯招徠外區懷之則四封之內其理可知
也朝典疇庸進階至銀青光祿大夫時庸蜀失阻公密
疏請發卒徒五千循伏波故道由焚蠻抵岷峨以會師
期誅不恪詔可其奏就加禮部尙書秩正三品疏封東
海命書未及至奄捐館舍禭以太子少保印綬弔祠稱
焉是歲改元元和公之生七十年矣嗚呼以文發身以

智經物惠和直溫忠恪廉清佐賢侯長轂皆有理効在
韶也興事功在景也修班制朗寧察風俗南海整師律
以八命居六官攸好德考終命其蹈履之全乎夫人渤
海高氏早歿繼夫人扶風郡夫人竇氏柔明有賢行嗣
子右衛倉曹元弼似續文敏號咷毀慕以某月日寧神
于東都偃師縣之某原乃刻石以傳永久銘曰
噫徐公有質有文有義有仁名聲章明邁群倫兮噫徐
公不忤不求不緇不磷贊佐四征暢嘉聞兮公之牧人
于韶于景于邕于廣朱轡照路攸往兮公之愛人以
清以靜以惠以養流庸集附如影響兮如何不庸奄忽

鞠凶著龜之同天地之中吁嗟乎徐公

唐故尚書工部員外郎贈禮部尚書王公改葬

墓誌銘

并序

元和十年秋故兵部尚書贈尚書右僕射王公之孤曰
元秦元質元弼等舉其王考贈禮部尚書之殯于玉山
王妣贈隴西郡太夫人李氏之窆于潁陽泣問龜策得
八月壬寅安祔于萬年縣鳳棲原吉克成先志孝孫之
心也尚書諱端字某太原人曾祖某某官祖某某官代
理儒術至公以文學策名舉進士宏詞連得雋於春官
天官之下解巾崇文館校書郎改右驍衛兵曹掾隴石

節度奏授大理評事爲其上介天寶十年拜監察御史
十三年轉殿中侍御史俄以本官內供奉贊東京畿採
訪之重十四年遷工部員外郎謝病請長告南浮江湖
因寓幽陵兵亂啟手足于行次春秋若干是歲乾元二
年也娶隴西李氏隋太師申國公穆五代孫吏部郎中
問政之孫城門郎韶之女賢明有儀操生子三人長曰
綽被服緇褐修無生法次曰紆以文章繼公用雋造履
清近諫垣載筆在帝左右綱紀都曹典司庫兵歷外郎
正郎直誠厚行爲士君子儀矩次曰紹繇小司徒三爲
六官於外則保釐東郊節制徐方當德宗朝嚮納尊信

漢廷臣莫二時上馭天下歲久宰政之外大僚往往以
辨智材能獻熟得君者或險決以務忤害或妄誣以取
快愜僕射則和平將順不疚不惑人到于今稱之故公
以義方昭慶再受二千石五曹之錫積厚流光可勝言
哉先遠襄事未得吉卜而歿元泰等茹荼繼志經啟鮮
原以德輿與其先人同於汴東江西從事同爲郎吏同
爲尙書藐然無容見託傳信雖文之朴野其可辭乎銘
曰
尙書爲父僕射爲子家聲章章令聞不已萬有千年兮
邱封在此

唐故朝散大夫使持節都督容州諸軍事守容
州刺史兼侍御史充本管經畧招討處置等使

譙縣開國男賜紫金魚袋戴公墓誌銘

并序

維貞元五年夏四月容州刺史經畧使侍御史譙縣男
戴公至部之三月以疾受代迴車旣駱六月甲申次于
清遠峽而薨春秋五十八明年正月庚申返葬于金壇
玉京原之舊封宜敘世德以識幽窆云公諱叔倫字幼
公本譙國人其先在宋爲公族於漢爲儒宗東漢則有
司徒涉西晉則有司農逵逵後南渡始居丹徒八葉至
宋臨湘侯明寶曾孫梁左丞曷曷元孫皇德州司士好

問公之曾王父也王父修譽父眷用皆自縻天爵不顧
翹車傳次君之禮文盡通奧旨師安道之晦德尤惡知
名故世風純慶及公而發公早以詞藝振嘉聞中以材
術商功利終以理行敷教化率履素王之訓周旋君子
之儒淑聲休明苾芬四暢初摳衣於蘭陵蕭茂挺以文
學政事見稱蕭門文本菁華而長於比興粲如采章鏘
如珩璜鼓鐘于宮累辟大府分命于計相也則爲湖南
河南留後自秘書正字三遷至監察御史曳裾于賢王
也則爲湖南江西上介由大理司直再轉至尙書祠部
郎中其阜人成化也則東陽一同之人沐旬歲之治撫

人飶三年之惠容人被踰月之教夔人聞詔而歡承訃而哀不及蒙其澤厯官十一而雲安不書所至之邦必刻金石始在轉運府也董賦于南荆會蜀將楊琳擁徒阻命詔書告諭初無草志宵引銳卒劫脅使臣曰歸我金幣可以紓死公山立不撓勇生于仁端其詞氣強於師旅暴叛知感乞盟于公黎明率其徒西嚮拜泣指期詣闕冢臣列狀天子召對而推功于府不伐其勞時談翕然勇讓具舉其在臨川也清明仁恕多省費力畧蜀郡崇儒之化南陽均水之法精力區處民以便安田壤耕闢獄犴清淨居一年壘書褒異就加金紫未幾而有

容州之拜且都府所治列城十三訓戎撫俗之任招徠
式遏之寄非通方明畧無以威懷蓋皇慈所軫先於柔
遠方將愷悌於夷落致風俗于休嘉議者以九伯二南
可跂而至天則不弔末如之何君直清篤厚博物通理
有大學之明誠大雅之疏達靜如淵泉動如鎔千不緇
不磷與令問始終起布衣儒服位視方隅歸全之日纔
具祭器去國見麾幢之盛返葬備祔轉之儀列松楸于
舊封展牲牢于新薦哀榮之禮鄉黨稱焉初公娶京兆
韋氏永州長史采之女繼室以博陵崔氏殿中侍御史
殷之女皆淑明柔嘉不幸早世允子曰郅曰邠年甫及

林董之文集 卷二
亂哀如成人公仲兄新城長伯倫以子夙承公歡且有
遺託旣不獲讓是用直書銘曰

信都九江文禮章章百代彌光司徒佐漢司農匡晉乃
熾而昌世無遺德時有通塞或行或藏克生容州貴爲
諸侯其道直方政成中和播爲頌歌化被二邦列爵疏
土燦爛龜組鑿聲鏘鏘宜享繁祉以媚天子今也則亡
返葬故里僊山之趾德音不忘

唐故朝散大夫使持節饒州諸軍事守饒州刺

史上柱國崔君墓誌銘 并序

博陵崔氏爲山東右族以政事方直稱者曰饒州刺史

諱適字某貞元十四年某月甲子寢疾終于所部之廨
舍春秋若干君仁厚信實方嚴清厲事無枝葉而願言
必踐交不諂黷而與人必誠深于士行精於吏職蓋其
天性然也一命爲懷州叅軍累遷至大理評事司直監
察御史好時武功二縣令常絳二州司馬乃理富平遂
佐興元貞元十一年春以西諸侯之師轉粟調食特拜
倉部郎中兼御史中丞以董其事其年冬徵拜衛尉少
卿明年改鄧州刺史麾蓋將行又換鄱陽厯官十五竟
未充量其爲御史也賈常侍至以才名尹轂下實所慰
薦爲之賓介蔣常侍沈以公廉幹河運交辟將事宏助

居多其宰封畿也縣鄙之地直于西郊禁衛之師勤于左次事爲之節官修其方軍與人安闔境謠誦其佐晉陵也晉國韓公當撫封之重署爲推官輶傳所至平反審克假守新定新定之人宜之薄于進取未數月引去其領陵邑也充奉肅敬里閭均定黠吏強家望風累息相率屏匿者十八九其分憂爲邦約已惠人樂易而知禁清明而不擾此皆厯職必聞之效也至若章章尤著爲士君子之所景行者則奉使西土鄙能言之縣官以乘塞宿兵旌旄相望饋饗之重非君莫可旣而經費出納制於中臺尅伐之人順非言利大率以布帛之不中

于度不鬻于市者積以歲濫備其名物移用於軍增三
倍之價平糴于人無一時之蓄掠是根本命爲奇贏旣
衰邊備實蔽理道時有覆視誨其相蒙徒列簿書之文
不登釜鍾之量因緣謬巧觸類而起君受命不苟臨事
風生條其積弊盡達聰聽雖狃狃之吠營營之飛置於
度外不直不已連章上懇詞旨深切羣情惴駭處之恬
然謝病乞告終無所屈皇明嘉納入亞九卿時縉紳之
士多以憑暴爲戒怵迫附離而不能自固者多矣如君
之特立剛毅不更其守古之儒行何以加焉此德輿所
以受其孤之哀請而不敢辭也君之曾祖元基皇朝散

大夫會州長史祖紹先皇揚州揚子縣尉父炅皇大理
司直兼河南河陰縣令代名士行裕是遺烈初君娶于
某氏某官之女生子曰包而歿繼室以某氏某官某之
女皆有淑行如君之志以十四年某月日叶用吉卜祔
窆于河中某縣鄉原之舊封禮也初包以德輿朴而好
直且嘗奉行君之命書者四乃列其官簿次第俾識于
墓石旣而包毀瘠滅性天于倚廬之中諾其請矣故銘
之曰

崔君之直兮不枉尺兮崔君之正兮不由徑兮展如之
人宜錫蕃祉兮天實奈何一麾遄已兮檐檐帷裳來自

鄙之陽兮峩峩邱封葬于河之東兮刻此貞珉識清風
兮

唐故使持節蘇州諸軍事守歙州刺史賜緋魚

袋陸君墓誌銘

并序

君諱參字公佐吳郡人曾祖某某官考某某官君蚤孤
與兄隱居于越越有佳山水率子弟耕汲於其中日修
桑門之法擯落人事貞元初兄旣歿始爲宗姻二友所
強慨然有應知己之心繇試佐環衛厯大理評事攝監
察御史裏行佐黔中又以殿中侍御史內供奉佐浙東
凡四居憲賦介二方伯皆有直聲休利邦人宜之十二

年所從既罷繼之者再至率以重禮禮君終不能屈非
所樂而不苟合故也朝廷宗公賢大夫多悅其風十六
年徵拜祠部員外郎居二年執事者上言其才請爲劇
曹會東方守臣表二千石之缺天子方加恩元元循責
吏理面命執事曰誠如是姑使爲郡須其報政縻加好
爵遂拜歙州刺史在途發瘍夏四月景子卒於洛師享
年五十五夫人河東柳氏殿中侍御史并之息女才淑
有賢行長子某年在羈貫嗣子某未離襁抱夫人旣得
吉卜且以孤藐之詞請表墓于父友故鄙夫泣書于寢
門之外而不讓云君峻而通直而不黨至若流俗之齷

齷細人之姑息屑屑汲汲之態不萌于胷中器度夷遠
英華發外居常無怵迫臨事有風節同心定交造次以
之評議鑒裁清明不惑聳善親仁發于肺肝文章宏朗
有作者風格學不爲人與古爲徒嚮使登其年充其量
束帶公朝其骨鯁魁壘之士歟常與故虔州刺史隴西
李公受故右補闕安定梁寬中今禮部郎中京兆韋德
符右補闕廣平劉茂宏秘書郎趙郡李叔翰方外士右
諭德博陵崔公頴暨予友善噉夫相視莫逆行二十年
洪範之攸好德儒行之遠莫致今則已矣可勝慟耶時
貞元十八年歲直鶡首秋七月甲子鏤堅石而銘曰

皦皦陸生中和粹清直如朱絃潔如白珩或默或語不
將不迎如何斯人奄忽冥冥蚩蚩下輩戢穀或丁瞍瞍
芳蘭嚴霜夙零命不可問死不可作嗚呼陸生

唐故尚書司門員外郎仲君墓誌銘 并敘

君諱子陵字某其先魯獻公仲子曰山甫入輔于周食
采于樊其後魯有季路衛有叔圉用儒行政事代爲家
法曾祖訐始自彭城徙于蜀郡祖襲博究六藝州閭推
重考遠清靜寡欲理老嚴之言三代曠僚純白不耀君
卅歲好古學與同門生肄業于峨嵋山下採摭前載可
以爲文章樞要者紬繹區別凡數十萬言大曆十三年

舉進士甲科調補秘書省校書郎歷同官醴泉二縣尉
貞元十年舉賢良方正拜太常博士轉主客司門二員
外郎十八年乙巳寢疾歿于靖恭里第享年五十九修
身慤固爲學精力其初典校有詔百執事詳定冕服炳
然上奏得禮之中再仕旬內皆參奉常論誤之務后蒼
二戴曲臺石渠之論乖疑難正者咸折中焉有司請正
太祖東嚮之位而祧獻懿二主議者云云君議畧曰九
聖在天二祖在祧國家卜代及年未始有極宜立定制
爲萬代程請遷二主于德明興聖廟詞甚切正後以異
論紛紛又著通難一篇引今據古諸儒不能屈難留中

未下而知禮者直之爲郎三歲受詔典黔中選補賦祿
清平南人悅焉皇皇者華道於故里里中人以爲榮觀
復命踰年稍進郎位循性詣理恬於聲榮墮然放懷以
馮唐顏駟自况修詞甚博推本六經賦詩類事往往有
卓異不羈之韻邃於禮服上下古今儀制著五服圖十
卷自爲一家之言起庸蜀諸生以文義自達至禮官元
士三登於朝講義洽聞不疚不貽與夫憑覆露乘地資
而至大僚豐祿者難易殊矣子雲者老相如多病內外
掃之日圖書樽酒而已升東榮而復者假他人之室可
悲也夫其發嗣郢王之藻女宗室公宮稱其賢淑生一

子無頗幼學而孤卜七月甲申窆于萬年縣之某原其
理命也德輿常忝知君用深怛化遺孤哀請因直其詞
銘曰

噫仲君直而文心秉彛學軼羣富宏議暢嘉聞中止水
外浮雲理冥冥化沄沄刻圓石識幽墳

開化圖書館

Wakuhwa Library

權載之文集卷第二十五

唐權德輿字載之

墓誌銘

唐故朝議郎行尚書倉部員外郎集賢院待制

權府君墓誌銘

并序

公諱自挹字某天水人其先殷王武丁之友因封命氏
楚遷於郟處秦徙于汧隴縣代多才繼有勲力四代祖
襲慶周開府儀同三司相定冀青殷五州諸軍事冀州
刺史齊郡公會祖武隋開府儀同三司浙豫桂三州刺
史潭府惣管始平郡太守右武衛屯衛二大將軍天水

縣開國伯考無悔皇朝請大夫晉州趙城縣令公年十
四太學明經上第因喟然曰學不足以究古今之變而
干祿者非吾志也遂養蒙于終南紫閣之下窮覽載籍
號爲醇儒非其道不合非其人不自厯南和寶鼎二縣
尉天寶中河湟之間踐更以禦寇平糴以饋軍皆以御
史董之聯辟從事旣而幽陵兵興二京震蕩摺紳之士
多在劫中公艱貞終吉盜不能汚尅復之歲制授醴泉
尉尋攝監察御史充河西隴右宣慰使崔中丞伯陽判
官輶車所履人誦其惠歲中崔復命遷左馮翊表爲祠
曹且佐州師朝廷以公文而無害特拜監察御史謙以

自牧受大理寺丞學該今古加集賢院待制職通理典
遷尚書倉部員外郎大厯五年春感風疾請告十有二
月終于布政里私第享年七十惟公得大易之含章中
庸之居易知前古之善敗稽六學之義類靈龜恬然天
爵自貴夫如是則通籍書殿起草中臺於諸生不爲不
達而充公之量則未也與故王右丞維今歸尚書崇敬
爲文雅道素之友其餘或不踐其域故知我者希夫人
太原王氏監察御史造之孫也鄠縣令侑之女淑行明
德輔于公志叢是福履近于期頤公之喪旣除二十三
年而夫人歿壽九十三時貞元十年十有二月也嗣子

某官皆以舊德蕃社叅居吏員盡厥誠信貞于龜筮以
十二年二月祔葬于咸陽縣洪瀆原禮也以德輿諸孫
之列習于舊史郊子之學誠慙古人滕公之室敢識幽
壤銘曰

周隋之間受封于齊代有武功抑抑倉部德音不同藹
然儒風考正圖書彌綸憲章其道昭融黃裳之吉大雅
方直位則未充惟此令德與彼內則委鯀而終咸陽古
原祔窆雙魂淑聲無窮

唐故金紫光祿大夫司農卿邵州長史李公墓

誌銘

并序

公諱銘字某不書州里尊宗室也初景王之友啟封于
蔡繼別爲宗厥後多材皇襲濟北郡公孚公之曾祖也
隴西郡公津容公之王父也濟北仕至國子司業贈太
僕卿隴西仕至慈衛汝邢青五州刺史終永王傅以至
列考愴厯監察御史殿中侍御史尚書倉部員外郎累
贈職方郎中虢州刺史公卽虢州府君之第若干子也
憑是積厚蔡生福祉少以門子入官聯調兩宮環列之
佐次補伊闕丞是歲天寶十四載也虢州捐館幽陵兵
起茹毒違難南浮江淮旣除喪宣州觀察使鄭昞之表
爲廣德令時劉展阻命東方愁擾閭里制于萑蒲守臣

化爲寓公而公之縣鄙連亘山洞盜有陳莊陳五奢者
是焉囊橐攻剽相因戾之跳在尋陽牒書密至署爲上
介俾輯輿師靖綏攘遏人用寧紆後厯揚州太原二紀
綱掾府之損益皆所關決執法殿中侍戎北門會罷使
至京師獻狀居最拜奉天令有命成城績用居多未踰
年遷侍御史充宣武軍節度行軍司馬時師帥以睢陽
及譙進律開府韓厥之任朝選爲難蓋以彌縫左右非
公莫可最凡三爲尙書郎四兼御史中丞以銀印青綬
厯官相常伯之重府遷大梁職尊統師公皆以司武從
之蓄資力以崇威望宣忠勞以宏班制居則持重戰則

有功無細無大繫公謀是賴雖羊舌職之聰明肅給鐸
遏寇之恭敬信強無以過也貞元二年真拜左庶子三
年復以本官兼御史中丞充入蕃使尋兼御史大夫行
次回中察其陰詐密疏累陳不可莅盟之狀時朝議已
行謀塞不用旣而戎人衷甲急變上聞乘車東轅獨以
智免以久次遷衛尉卿秩以金紫乃命大農爲國之泉
首公修職惟直是視無所阿附終用蔽傷左遷邠州長
史以十三年十一月日寢疾終于所莅之官舍春秋若
干惟公開敏毅直信廉仁勇有政事方畧長于理煩遠
而不泥文而無害始以通邑行師振其名聲交辟元僚

翻飛清朝腰金鳴玉法象河海議者謂蕃垣京轂公宜
居之終以當官有守寧拙不苟不爲利疚於回鬱堙下
國以至大病始可嘆已夫人范陽郡夫人盧氏某官某
之孫新安丞某之女華宗淑問光輔閨門無詒離無攸
遂內姻外姻仰其徽風先於公二年而歿長子元亮以
武略至御史中丞不幸早亡次子元道以吏才爲大理
司直兼監察御史叅陳許軍事次曰元規進士第整屋
縣尉次曰元會前右金吾衛兵曹叅軍元簡江陵府叅
軍元舉太元府叅軍元弼元衝元輔等皆裕蠱知方儼
然在疚考于象數先遠得吉以十四年某月日奉公夫

人之喪祔窆於伊闕縣萬安山南原先公之兆域禮也
德輿王父王族之出也先人于公爲中表昆弟羈貫獲
見殆四十年元道等泣以墓石見託雖文之鄙朴而不
敢辭也銘曰

抑抑司農系于蔡兮三珪再踐直方大兮心廣體胖道
將泰兮中立不回官左退兮發書問鵬禍所會兮撰日
焯龜紛祖載兮萬安鮮原風雨晦兮鏤此貞珉墜之內
兮

唐故朝散大夫守司農少卿賜紫金魚袋隴西
縣開國男李公墓誌銘 并序

公諱條字堅後以字爲諱淮安靖王贈司空神通之元孫也鹽州刺史孝銳司空之昭也宏農太守璟鹽州之穆也太子太傅贈司徒齊物公之禰也尙書左僕射贈司空復公之兄也代以忠厚而膺爵命勲籍吏部皆冠宗室公稟是慶祉生而朗邁宏毅疏達方廉孝悌學以遜志文而無害始以門廕參調三命官至廷尉評明清閱實適其輕重改宣城令滿歲受代縣人以理狀乞留廉車上聞詔可其奏且加大理司直從人欲也縣鄙之南水泉委滙每暑雨流淹輒傷大田公乃峻爲之防悅使其衆人就安利稼皆登成大厯中鄜坊節度使表爲

上介遷監察御史殿中侍御史中權策畫一以吞之成
師足食邊備益固使罷除昭陵臺令貴強沓貪奸冒法
禁公職在充奉露章以聞以爲巧言所中坐貶建安尉
在途累疏詞理劇切上覽而直之罪人就誅方議牽復
屬太夫人棄敬養貞元初移蘄州長史尋徵還京師執
事者銳於引重公亦啟心獻熟會一人有漢宣共理之
嘆拜泉州刺史泉人宜之入爲宗正丞時卿長與其貳
不相能告訐之書紛然交訴詔公平之皆得其中自後
屬籍疑讞顛其聽斷兩造以明九族以和九年授果州
刺史先是里下無廨署官司無令書節用量功經構講

聚百堵乃興九章粲然政用樂易人皆輯附居部明年
有女道士謝氏白晝上昇優詔嘉異州閭咏嘆十一年
以課最陟爲司農少卿國泉邦用精力區處利病陳聞
靡不纖悉十四年宸心憫雨比屋艱食出其陳陳以活
元元又百吏之祿廩以粟易幣則輕重相準而便於人
皆自公發之也公稽覽故志通練程品嘗獻軍國便宜
五章推理道以及人事其他奏議皆附經術有蹇蹇匪
躬之操焉渥澤日加方厚其屬任而才命相蓋末如之
何十五年三月乙巳以疾終于勝業里私第享年五十
九夫人滎陽鄭氏某官某之女姿操柔明先于公若干

年而歿乃者以公之勤追封滎陽縣君其孤曰昌舉進士甲科淑行至性公族稱其有後以其年五月甲寅龜筮襲吉血涕奉喪祔墓于萬年縣某原先公之兆域以德輿獲詳踐履俾篆斯文其銘曰

昔在靖王愨策司空至公父兄亦命三公公族家代車服以庸允矣司農直方懿恭行惟遜悌仕乃廉忠利及剌鐘輕翰遡風時方大來命則不融柳車遲遲棘人充充如履夏屋歸全舊封圓石琢銘永識于中

唐故鄜坊節度推官大理評事唐君墓誌銘

并

序

君諱欵字嘉言北海人曾祖貞休皇比部郎中河南少
尹祖詡太子洗馬考試河南府士曹參軍代有懿行遠
承華構君清方敏厚幼有立志與伯氏文編講議修詞
知名於士友間其文筆浹洽而長於比興其義行潔修
而篤於友悌貞元初舉進士甲科解巾補宮衛紀綱掾
右輔守臣撫封辟士表爲支使轉左領軍倉曹明年復
調爲左金吾領曹因喟然曰吾三命不越於環列其道
蹇歟滿歲晏居吟咏情性而已會故人彭城劉景通受
天子推轂之重鎮于洛郡辟書旣至命書繼下以廷尉
評理軍訟未幾請急省兄于盛山又東南至于雲安間

關巴峽嬰冒霧露俄而景通入覲爲冬官司空方欲盛
薦君於獻納侍從之列景通旣列左右曹中執法多所
引重而枕疾不起悲夫時二十年秋八月王子其年四
十有九昔崔駟管輅官不過長岑令少府丞而當時之
翕然扇巧言進取滿志者可勝道哉天闕紛綸從古所
歎初娶馮翊嚴氏興元長帥相國太保公之女不幸早
亡繼娶天水權氏華州司士參軍集之女子之從祖妹
也有明識淑行爲六姻儀法結縈周月遭罹栢舟之痛
遺脣方娠可哀也哉予與文編周旋於文章道義二十
年矣故辱君之歡亦舊淮湖睽阻京轍會合合姓怛化

在旬歲之中寢門屑涕情何有極冬十月庚寅其孤揮
旣得卜吉窆于萬年縣義善原且虞正夷谷變不可以
不識遂爲銘曰

一氣沄沄浮休滑潛英華未申奄忽歸根于嗟乎嘉言
于嗟乎九原刻此清芬

唐故太原府史事軍李府君墓誌銘 并序

君諱雍字某趙郡鄆人曾祖萬安皇鄒平郡丞祖頊贈
鄭州刺史父日知皇銀青光祿大夫黃門侍郎侍中戶
工刑三尚書君承廕休覆露而資性和厚有詞藻工篆
隸起家太子通事舍人轉太常寺主簿年甫成童卓然

有立志歷都水監丞長安丞轂下難理號爲稱職下太
夫人韋氏憂免喪猶毀不交人事尋詔除太原府錄事
參軍已抱沉痾以開元十九年夏五月没于長安昇道
里享年四十五噫嘻以侍中公之寬明正直忠孝于君
親書在國籍爲景雲賢相宜其子姓昌阜有韋平之慶
而義方積善所及不過于丞吏都吏未強仕而天斯命
矣夫人范陽盧氏殿中侍御史敷之女司勳郎游之妹
華宗淑行先没者二歲有子元之仕至晉州洪洞縣令
愷悌之化行於鄉黨命屈其才亦不至大官洪洞之子
曰鄧州新野令彬萬年尉彤陳州太康主簿彩太公廟

丞彬前明經彧等以吏以文循守家法君初嘗謂洪洞
曰吾家代壤樹在周鄭之郊延陵瀛博豈限故土苟吾
啟手足必促擇不食之地而歸全焉故君沒之歲秋八
月權窆于萬年縣龍首原厥後七十有七歲彬彤等居
內憂忍哀襄事因竭誠信循祖禰之志啟君之窆遷祔
于京兆府奉先縣漫衆鄉章保里從吉卜也與洪洞君
庚甲分穴昭穆列次聿修之義情理無違而彤又狀其
祖德請刻墓石抑予之重表甥也嘉其忠孝而銘之其
詞曰

伊昔侍中實相睿宗以孝以忠穆然清風乃生良士博

約仁義坦坦居易鬱堙下位家有孝孫卜茲鮮原刻勒
清芬藏于墓門

唐故監察御史清河張府君墓誌銘

并序

君諱衆甫字子初清河人曾祖尚皇海州司馬祖宏藝
皇兗州曲阜縣令考隱皇淄州司戶參軍君早爲諸生
能以學行自力寬廉而溫朴厚而文居易向晦固窮不
變故年過耳順而方脫章甫冠惠文示不苟也初爲轉
運使所辟解巾太常寺太祝轉河南府壽安縣尉罷秩
歷年僑居雲陽時以緣情比興疏導心術志之所之輒
詣絕境閒以羈旅遊京師卿大夫聆其風者方以聲韻

屬和不暇會淮寧軍帥之始至也春東僚佐求士於朝
朝賢多以君爲才辟書薦至俄拜監察御史且爲從事
讜言幕畫舉無違者徵軍實於廣陵因涉江省家道病
沉痾不克復命以建中三年三月日至家而終享年六
十八夫人汝南周氏先於君歿其孤曰實曰宇年並孩
亂未勝縲絰遂以其月日權禭焉嗚虘貴仕眉壽或與
令德不并此昔賢所以爲歎姑以景行茂實賁于重泉
銘曰

洪範之義享用五福展如之人宜荷百祿嘉言婉婉則
罔攸復旣鐵其冠亦朱其服浮休沄沄歸全返真喬木

荒墳于嗟乎張君

唐故揚州兵曹參軍蕭府君墓誌銘

并序

君諱惟明字某南蘭陵人曾祖浚皇丹州刺史祖文遠
皇睦州別駕考重暉皇金州別駕自丹州以降雖位不
過守佐而皆以行義似續君卽別駕府君之元子也天
寶中舉秀才數上行過乎謙竟不得居甲乙科時苟未
至雖巧力無所措其用否不可久後累爲知己薦自明
州參軍事至揚州兵曹掾凡更四官皆有理效多以名
聞薦拜或參從事之列向非及有餘而用無滯疇能及
此晚歲病風家于丹陽葆真樂和樽酒自適輕財重義

推誠于朋友之間不飾邊幅以曠達自任初君與令弟
故司封郎中惟則同以儒服游京師賢士大夫締交慕
義者如響郎中以通才厯職而君亦累爲名公所薦年
位未至相次凋落嗚呼以建中二年四月日所疾沉痼
終于丹陽私第享年若干以某月日權窆于某所從宜
也夫人扶風竇氏婦道柔明三子颯潮汐等年未志學
藐然無怙芻挽將行哀以求銘誌曰
南齊之後福祉薦臻厥生兵曹洵美且仁如何中路翳
魄荆榛刻石窮泉永志聲塵

唐故潤州丹陽縣丞盧君墓誌銘

并序

君諱峴字某范陽人自魏已降官婚人物爲天下清甲
大畧書于國史詳言在乎家牒今所書三葉自曾王父
衛州司馬府君諱宏壽初貞晦不仕公車徵拜至冀州
信都主簿府君諱友裕友裕生揚州高郵縣令府君諱
相君卽高郵之第若干子奉前人之業講先師之訓以
之克家以之從政直方謙厚卑不可踰筮仕三次不離
州縣之職曰亳州蒙城主簿楚州寶應縣尉潤州丹陽
縣丞寬敬莅事不希名譽故每當廉問薦延之日使臣
陟明之舉皆遷延晦避時議多之清行懿名竟用不振
以大厯九年七月日寢疾終于官舍享年五十五其婺

隴西李氏柔順有婦行嗣子某等訣于著蔡銜恤襄事
以關河不靖未克歸祔遂以某月日權厝于縣之北面
焉從宜也予僑居丹陽常與君游故粗書事實以備刻
石銘曰

生死泫泫如環斯循于嗟盧君於此歸根

權載之文集卷第三十六

唐權德輿字載之

墓誌銘

王妣夫人宏農楊氏祔葬墓誌銘

王妣夫人姓楊氏宏農人祖敏皇太僕少卿交州都督
金鄉縣公父晏湖州武康縣令夫人始笄歸于王考府
君名重而祿薄家肥而身約仕至左輔尉中兵紀綱掾
所與游者皆天下儁人賢士夫人無攸遂勸以義之道
備焉天寶四年先太保貞孝公旣孤夫人慈仁訓育以
文行紹續繇進士第授臨清尉薊縣尉安祿山之亂也

以大節聞履險違難崎嶇色養滅迹人事以扁舟爲家
至德二年夫人棄孝養于杭州富陽縣之行次時四方
兵交歲大疫江東尤劇未克歸耐此焉寧神先公號咷
崩毀因中風濕痺痼外除拜御史右史著作郎皆以疾
不祇命大厯丁未德輿丁茶蓼貞元戊辰再集艱棘餘
生未泯積慶所鍾因緣踐履叨冒崇大以歲時之不易
事物之多故久未遷神心焉若摧言陰陽者利在卯酉
元和五年歲直庚寅德輿忝太常卿以明年之吉襄事
旣具其年猥叅宰政禮不克就乃建宗廟以嚴蒸嘗逮
今十二歲在丁酉德輿以檢校吏部尚書理戎漢中拜

章上請協用龜策啟先太君壽堂于丹徒啟夫人壽宮
於富陽七月壬寅祔王考府君兆域于東都伊闕縣慈
水之陽吉自杭抵洛几二千五百里水陸安靜誠信無
違天之佑也惟尊靈幽閔周一甲子罪在孱菲宜當誅
殛而懿範遺訓流光孕休閨門受祉施于子孫霜露怵
惕如惓如醒又德輿之生也後不獲逮事逖聽令聞靡
詳萬一故合姓之紀歲棄代之享年皆闕焉刻茲介石
以永終古銘曰

惟王母之令德淑明柔克閨門延耀以引以翼王父安
卑兮其道未光先公大節兮易名章章伊孤孫之蒙駭

不獲逮事慶靈流澤兮積累名器溯河湯湯轉車帷裳
伊水之陽耐于幽堂萬有千歲兮徽音不忘

先公先太君靈表

先公以大厯二年歲在丁未夏四月十四日棄代于潤
州先友趙郡李公退叔已為之墓表先太君以貞元四
年歲在戊辰夏六月二十三日棄代于洪州亡友安定
梁肅寬中又為之墓表乃今元和十二年歲在丁酉秋
七月十五日壬寅孤子山南西道節度觀察使銀青光
祿大夫檢校吏部尚書兼興元尹御史大夫扶風郡開
國公德輿始獲備誠信以追命徽數昭告啟二封于丹

徒耐神于東都萬安山之北原其終始大要官伐大本
並已具李氏之說孤窮噉號以補其缺文先公以永貞
元年再追命爲工部尚書元和二年三追命爲太子少
傅七年四追命爲太子太保太常考行易名曰貞孝公
先夫人元和元年追命爲燉煌縣太君二年再追命爲
絳郡太君先公有事君事親之大節道積于身而不得
大行於時時不得蒙公之化士大夫之論炳如日星曄
若鳳麟夫人輔佐中饋爲人倫師式上事姑下訓子爲
順婦爲慈母孝愛寬順得內姻外姻之和如惠風甘雨
長育生物永惟二尊并包徃順用晦其明不丁於時受

名器褒錫于冥冥之下覆露蒙昏叨冒顯榮踰量腊毒
日俟顛隕嗚呼曾王父以上塋於本州今限異域王父
葬于伊水之陽屬者下祔于伊水之陽不吉得萬安山
之原吉以歲之不易與時之多故久未遷神懼至沒身
常泣謂稚子璩曰苟吾未襄事死而不可以歸骨於九
原不可以請諡於有司今則天幸克申私志異時從先
公於斯丘也是得養于下也尊行淑聲備于前銘繼此
撰刻哀荒罔極

獨孤氏亡女墓誌銘

并序

元和十年歲在乙未冬十月二十一日戊午故秘書少

監贈絳州刺史獨孤郁妻天水權氏寢疾終于京師光
福里嗚呼吾之女也故哭而識之惟吾門代有懿德至
先君太保貞孝公之大節大行爲人倫師表故鍾慶于
尔而又天闕其成此吾所以不知夫天之所賦也初筭
有行未嘗遠父母兄弟考室同里常如歸寧始絳州以
褐衣納采其後爲侍臣史官更掌中外詔誥皆再命或
三命十數年間便蕃清近喧赫光大天下公議以宰政
待之其於閨門之內佐君子供先祀嚶嚶申申有孝有
仁乃者吾忝大任絳州居近侍而能婉約勞謙得六姻
之和長信官受冊命之歲與母於內朝序位環珮之聲

相聞黨族榮之人情禮意纖微矩度言內則者以爲折
中噤夫絳州方強仕不淑尔又未練而歿年止三十一
天之報施其何哉始稱未亡人也懼貽吾憂每歛戚容
而爲柔色然以沉哀攻中竟不能支悲夫初先舅憲公
有重名于時絳州生而孤不得逮事儻冥冥有知將同
穴而養于下耶抑智氣在上歸于冥冥耶吾不知也生
子二人女子一人長男前一歲未成童而夭次日晦生
十年矣至性過絕人未暮月再丁荼蓼嗷號罔極晦世
父右拾遺朗茹終鮮之痛撫之如不孤貞于龜冊得明
年二月六日壬寅祔葬于東都壽安縣之某原宜琢墓

石以永于後吾老矣豈以文爲懼他人不知吾女之茂
實故隱痛而銘曰

暘光未晝而湛晻兮植物方華以槁落兮懿吾女之淑
令兮祔君子於冥冥已乎已乎吾不知夫神理之有無

殤孫進馬墓誌

權氏殤子名順孫小字文昌以被病用桑門法更其字
曰君吒贈太子太保貞孝公之曾孫今刑部尚書扶風
郡公德輿之孫渭南縣尉璩之子始仕爲僕寺進馬三
十三年以元和十年十一月二十二日天子光福里二
十七日斂手足形于萬年縣神和原旣闔棺其大父泣

而誌之曰尔幼有敏志孝順敬遜承大父母父母之教無違旨雖孝子順孫成人者之養不若也故吾以名之讀孝經論語尚書尤好筆札不離硯席凡舉措語言循理論義出常童遠甚方肄小戴禮業未竟而感疾自春涉冬綿四時瀉劇大病之際上辭尊長下訣幼弟妹恬然不亂且謂其傅婢曰空中佛事儼然在目促焚香移吾枕西嚮合掌而絕始吾常疑神滅不滅之論逮今信矣噫嘻以尔已仕且有成人之志吾欲勿殤知禮者曰不可而不敢逾也惟大墓在洛師得陪耐之吉於後歲故於是權窆而號曰

惟魂氣兮無所之尔之神得所往兮吾又惡用夫涕洟
叔父故朝散郎華州司士叅軍府君墓誌銘并

序

序曰洪範叙三德五福之道而德在乎人福繫乎運時
未光大則卷而懷之姑以清行厚德遺諸子姓而已公
諱隼字子鷲天水略陽人十二代祖安丘敬公諱翼爲
前秦司徒代有勲德以至四代祖平涼公諱文誕厯開
府儀同三司洪常二州刺史曾祖滑州匡城縣令諱崇
本王父益州成都縣尉諱無待烈考許州臨潁縣令諱
伋初平涼之先三葉開國匡城以降世名文行公纘成

茂緒祇服家法有大易之鳴謙中庸之慎獨慥慥其守
孳孳其勤中立而不易方夷道而不由徑故克家無玷
千祿有聲天寶末州里舉經明屬幽陵叛換計偕中止
解巾試守河西尉真拜鄆陵丞時東郊不開違難逃祿
艱貞潔白終出盜泉朝廷嘉之除楚州寶應丞是歲太
夫人弃孝養刺血寫大乘微言毀瘠過禮旣除喪爲親
戚所勉調補宋州宋城縣丞孟尚書某方持郡節深相
推重每歲考課居郡中最大厯中授福昌丞貞元初改
華州司士嘗辟彭城劉公蕭國班公之府皆分事任實
助經費所至之邦必聞其政所奉之主必以加禮而又

學古不忘歌詩必類緣情而不流體要而無害故秘書
包公謂公內外循理心正氣和君子以爲知言其道未
伸天奪之筭嗚呼貞元九年四月辛亥終于富平從事
之館享年六十一夫人陳郡殷氏皇曹州司法麗正殿
學士踐猷之孫河清尉寅之女故給事中杭州刺史亮
其兄也今侍御史郴州刺史永其弟也生德義之門襲
猗那之慶自執筭主饋逮四十年孝慈柔明六姻是仰
學備箴誦言成禮法公之祿甚薄而家甚肥中外無間
言諸孤猶已子閨門之內和樂薰如也旣茹未亡之痛
護奉輜車東旋洛都八月癸丑邁疾瀉終于新安之別

墅享年若干有男五人長曰少成仕至桐廬尉次曰少清以經術甲科次曰某曰某皆以文學裕蠡稟公之義方女子五人長適安福尉劉公範次適常州司倉齊暢其次未及笄皆稟夫人之明訓少成等曾未半歲再集茶蓼思養于下如不欲生銜恤忍哀竭其誠信以十月某日得吉卜於新安縣山南龍澗原禮也小子齒歲而孤夙承善誘且懼徽音行實之不傳于後與陵谷之有遷也謹用論譔哀而不文銘曰

惟叔父秉直清溫而文誠而明六試吏揚令名再從事有淑聲猗夫人懿純德倬婦行爲內則樂申申恭翼翼

女有家男述職天不傭降鞫凶道未行禍已鍾刻金石
識邱封德不泯哀無窮

再從叔故試大理評事兼徐州蘄縣令府君墓

誌銘并序

府君諱有方字某天水略陽人也曾祖崇本皇朝散大
夫滑州匡城縣令祖若納皇右補闕起居郎桂歛梓三
州刺史考倣杭州紫溪縣令代以儒門四科爲家法故
發于文則菁華施于政則惠龢公承是休德餘躬踐行
得詩之無邪易之通理凡五授命皆以推擇曰左清道
率府兵曹參軍太子通事舍人陳州司法參軍亳州司

士叅軍以至大理評事兼徐州蘄縣令滿歲南游遘疾
于途以貞元十六年夏五月歿于楚州之旅館春秋若
于夫人河間劉氏樂城公仁軌之元孫也明智才淑有
子曰長懦弱冠舉進士甲科文行清直泉其容水漿不
入以某年某月日得吉卜于某地其引也蓋殯也以輿
師繁興未遑歸窆于東周之大塚姑刻圓石書其畧云
公夷通直信睦姻任恤位卑而志宏居約而家肥有爲
有守不疚不跲其初命再命官衛贊謁雖未居真秩而
四方之嘉招狎至其後掾二邦奉六條受祿不誣實聞
其政或攝領通邑分乘輅車皆有裕人之仁急病之義

及理於蘄也能遂物之宜不奪人之時嘉惠善利洽於
千室猶卽墨桐鄉之理無不及也又嘗饋師于回中從
事於夷門皆有功利稱于其府其去蘄也西方節將議
委以謀猷介僕之重且謂弓旌之未稱也將以柱後惠
文之冠招公章旣上而公大病斯可歎已猶子族子自
朞及總侍疾承訃崩波塗潦又以見公風訓慈仁之所
逮也噫嘻自匡城至公四代而三爲縣大夫皆用循政
聞且以兩漢邴曼容陳仲弓爲準故不至豐祿加以梓
州之懿文盛德排抑於時道未光大終于郡節或者蕃
祉必復其在裔乎此宗門所以有望於公之孤之昌大

也既而緘公理命命以論誤小子愀然涕洟而為之銘

曰

恭惟叔父信厚清厲有車翹翹將事匪懈掾吏二部文
而無害施化一同斬人以父易象視履謂耆而艾奄然
不淑力命相戾楚挽虞殞風煙晦昧屬詞貞珉寧此厚
載

再從叔故京兆府咸陽縣丞府君墓誌銘 并序

府君諱達字某天水畧陽人曾祖崇本皇朝散大夫滑
州匡城縣令祖若納皇通議大夫桂欽梓三州刺史考
僕皇深州安平縣令自十二代祖前秦安邱敬公至四

代祖平涼公皆有勲力爲通侯大吏自匡城至安平以
女采政事爲列城二千石家法休聲貽于後昆府君以
士行吏理平端簡實大厯初調爲家令寺主簿厯同州
馮翊縣尉河南府登封主簿京兆府咸陽縣丞居之必
聞考績得之必由綜覈中外之姻或據戚里都俊鄉未
嘗巧從以去窮約且以枉道由徑食浮於人爲戒大率
每十歲徙一官故厯三紀而四受祿勤官肅事不誘于
長上循理蹈和不攝於健羨其有常歎其難進歎貞元
十九年歲在癸未秋七月壬戌感風疾終於新昌里享
年六十九先是夫人南陽張氏明茂有禮法亦天奪其

壽府君周縉既除三月而鞠凶及悲夫支子墳等謀於族屬家老以明年春三月己酉祔真宅於萬年縣龍首原謹書官次以納幽窆銘曰

幽丘而下曄曄圭組宜昌郿城乃代啟土平涼策勲梓州懿文家謀德風儀刑薦紳時惟叔父祇服丕矩始仕宮卿乃從左輔周旋二畿坦坦安卑遵道而行不競于時脩短奄忽兮嗚呼涕洟崇崗美楨分永識于茲

唐故河南府登封縣令權君墓誌銘

噫嘻吾之從祖弟曰少成字某仕至河南府登封令而歿其年五十七曾祖王父益州成都縣尉府君諱無待

王父許州臨潁縣令府君諱伋父華州司士叅軍府君
隼三業有文行而賦祿不稱當時才士各人皆與之游
君甫成童通左史古文小戴禮以經明調選爲睦州桐
廬尉凡七徙官皆以功次得調其爲右威衛紀綱掾尚
書郎有官人於黔巫者請爲之介裔夷得職其爲河西
尉奉職于左曹吏無奇袤其爲梁縣令也二千石領行
詔條繆行徵令而多賦于人屬城皆不能辨君毅然有
守折其疑文詞堅氣正不直不已梁人得以蒙其澤遂
其生郡表尤異拜河南府兵曹曹事修理元和十一年
調補登封春二月病風痺遽秋寢劇九月十七日啟手

林藪之文集卷二十一
足於官次悲夫君仁厚質實廉隅介獨潔清在公顛沛
以之探經術法義往往以文自道不務游談不馳名聲
深知者以爲古之循吏不若也階近赤紱官近朱轡謂
跋而及竟歿於周圻一同之地斯可慟也娶博陵崔氏
某官某之女雅有婦行長男頊以經明爲鳳州兩當令
專敏好學次日瑄華州叅軍薦志於文章幼嗣曰某曰
某皆在雅儒呱呱以泣頊等以明年二月安祔于伊闕
之舊封禮也嗚呼吾無葍叔父無葍大功兄弟以至於
君且有一歲之長班白相視疾恙相悲奄然委化痛入
肝膈故出涕而銘之銘曰

東周蒼茫兮甸邑鮮原以之賦政兮以之歸根嗚呼不
可作兮死生沕沕

唐故使持節郴州諸軍事權知郴州刺史賜緋

魚袋李君墓誌銘

并序

君諱伯康字士豐隴西成紀人自梁武昭王元孫文穆
公冲爲元魏僕射司空與兄穆侯恭侯惠侯莊公中秉
樞揆外顯方國文穆公二子長曰延宴次日休纂論道
追命皆至司徒蟬聯茂盛冠於百族君卽叔氏司徒之
後也曾祖仲進皇宣州司馬祖僑皇河南府澠河池縣
令父愔皇朝議大夫宗正丞贈濮州刺史三葉用晦士

不過郡佐縣大夫典司宗籍而天爵崇茂士林嚮仰君
以才實克家清方入官始爲知己者所薦授閩州司倉
掾轉下邳福昌奉先三縣尉皆有能名建中三年調補
御史臺主簿成奏未下以太夫人寢疾歸侍藥膳明年
丁內艱衣裳外除廸嚴君之命復調爲長安尉時王師
清宮鑿輅初復武人干吏理轂下爲多事邑之細大必
決於君每歲考績爲府中最貞元五年再集茶蓼終喪
猶毀不交人事屏居池陽以耕植自業九年春西鄙不
靖詔城五原以備邊鄜延節將選重賓佐以厚禮辟君
實董塞門之役不愆于素抑有勞焉拜監察御史轉殿

中錫以章紱尋遷侍御史加檢校工部員外郎凡十年
四徙官爲鄜上介伐謀而鄜之師以律折獄而鄜之人
不寃十八年從守臣來朝行次中部所從復于左轂護
其輶祿以至京師庀具會事稱情中禮十九年秋七月
拜郴州刺史精力惠養蠲除煩苦導利省嗇而人不擾
廉平信厚而吏知方今相國左丞鄭君頃移佐茲郡知
君也熟洎入總綱轄盛推理行再筦宰政方圖陟明斯
言未復奄忽凋落時永貞元年十月某甲子春秋六十
三悲夫君天資器幹機用強敏夷易䟽通不趨名聲學
尚周洽而情情甚麗業履端脩而睦姻允篤時人多知

君吏理過於文行唯故相太傅盧恭公今相國左丞鄭君臬鄙人實知之而棲遲下國迫阨委化斯可嘆已夫人范陽盧氏宣城縣令炅之女華緒令儀執笄佐餽先於君歿二十年矣嗣子盧氏縣尉操次子前明經掖支子某等皆以孝經而承訓儀君令弟爲長安主簿少安請急襄事崩波勤遠自荆抵洛泣奉轎車以元和元年某月甲子塋于某縣某原之舊封君子曰於長安之兄之喪有以見同氣之痛德輿以中外伯仲周知所履刻石紀事朴而不誣銘曰

柳之政兮理平君之行兮廉清矧有深知兮秉國之成

亟言于朝兮將陟其明
窘然符守兮奄忽冥冥
曾臆約結兮未攄生平
道途自遠兮廣柳芻靈
風雨所交兮卜洛佳城
元龜是貞厚載是寧于
嗟乎內兄

唐故長安主簿李君墓誌銘

并序

君諱少安字公和隴西成紀人自元魏僕射文穆公冲而下爲西州冠族或位不充者必以令德聞曾祖仲進皇宣州司馬祖僑河南府澠池縣令父愔朝議大夫宗正丞贈濮州刺史君卽濮州第三子敏信寬綽篤于行義方舉孝廉偶爲所親者薦延授冀州阜城縣尉旣非所好終不屑就王黔中礎之持節廉問也表爲推官轉

支使歷左武衛曹叅軍大理評事用誠直贊佐夷落
之人宜之府除至京師轉三原縣尉筦中書甲庫考績
四居上第遷長安主簿二陵復土之重比歲會同軌轂
下所莅儲峙無違典司廐置肅給安靜尹守以爲能方
授代而復表留一歲御史府司察視者數薦君自代君
方勇於退故朝命未及焉元和三年三月己酉感疾不
起於長安興化里第享年五十君溫仁孝友喻義循理
恢恢然有君子之度齒位皆屈而智者歎焉夫人滎陽
鄭氏太僕少卿叔規之女仁而不壽先是君元兄郴州
刺史捐館舍請急襄事間關勤遠間一歲有嗒然之痛

喪服甫除俄啟手足噫以積善之家而叢不淑如是糾
纏之數其可問耶嗣子棻授等號奉轎車以夏五月景
申祔于東都潁陽縣之某原禮也音徽未沒志義相倫
情殷中外年同甲子濡涕操管銘于墓門銘曰
族之盛兮才之令兮纔知命兮俄大病兮塋者藏兮潁
之陽兮誌丘荒兮杳茫茫兮

唐故洪州建昌縣崔君墓誌銘

并序

君諱遴字某博陵安平人也六代祖北齊右僕射昂以
文學正直周歷諸曹禮樂刑政所損益者十七八生隋
水部司門二郎中洽有風儀器尚以世其家司門生皇

掖縣令曇首掖縣生武邑令紹武邑生白水尉頊頊生
汾西令贈定州刺史昇之自掖縣四世含德不耀君卽
定州府君之長子故相國右庶子安平公其介弟也恬
淡愿慤不遷於時仁于鄉黨友于兄弟大歷中御史大
夫贊皇李公之宣風于吳也聞其賢起家表爲常州武
進縣尉跡徇知己心不近命俛視官曹非其好也建中
初嗣曹王分闔按部于九江之西又以名聞轉洪州建
昌縣丞君喟然曰莊生於陵子吾之師也惡用是哉終
不屑就先是築室於毗陵疏清流蔭碧鮮樹藝偃仰有
終焉之志貞元十年正月日寢疾終於其家享年六十

三夫人范陽盧氏華宗淑行動循禮法其孤景伯等年
未及冠皆專經趣善藐然銜恤護奉轎車以明年十月
某日歸祔于河南東原之舊封先遠故緩也季弟著作
郎述貞諒遜悌稱於士林抱終鮮之痛主歸全之禮以
德輿詳其所履俾爲墓誌銘曰

公綽之道澹無欲兮潔身用晦言可復兮視履考詳宜
戩穀兮乃如之人胡不淑兮周原舊封森拱木兮予以
寧神識陵谷兮

唐故給事郎使持節房州諸軍事守房州刺史

賜緋魚袋崔公墓誌銘

并序

公諱述字元明博陵安平人自東漢長岑長濟北相代
 擅雕龍之美濟北五代至晉大司農洪司農八代至北
 齊右僕射昂僕射三代至公會祖皇朝散大夫冀州武
 邑縣令諱紹大父同州白水縣尉諱頊烈考晉州汾西
 縣令贈定州刺史諱昇之代有文行懿德為北州冠族
 公夷雅溫粹安舒廉靜於座右銘得含光之妙於政論
 得理道之奧以之脩身以之理官蓋家法積厚而公能
 踐之之故也始自官衛試守未弱冠而為藍田尉已有
 嘉聞尋轉婺州浦陽令揚州兵曹叅軍皆以吏理著稱
 故辟書交委命書隨之歷監察御史殿中侍御史再為

侍御史實佐壽潭洪三邦車賦之重拊循輯睦繫上介
是賴府遷于荆薦言于朝拜著作郎虞部員外郎論著
奏議率循憲矩不毀方以求合不出徑以趣捷貞元十
二年出爲房州刺史承長帥剛嚴之理當輿師饋饗之
殷暴征繼起煩言狎至而能推情厲身以裕勞人惻隱
所被四封嘉靖十七年秋七月辛酉感疾捐館舍春秋
五十七夫人京兆韋氏承公宮之訓爲女士之表凡合
姓二紀柔而正勸以義之道備焉其孤文伯武伯等學
通禮籍姿性純至斬焉相視泣奉裳帷以冬十一月甲
子祔塋于東都某原禮也初公仲兄左庶子安平公有

重名于時安平所與游者公皆從而游焉故常與賢士
大夫推古今世道博約論辨摠之於詞凡數千言因曰
勝質之文吾所甚懼彼奔馳塞路者旣不可遏又惡用
斐然之爲邪遂輒削去其用晦如此行義醇備慈仁任
恤安平旣卽世伯兄繼沒猶子之解巾結禱先於巳子
故不舉火之日男未仕女未行其於疾則十起衣無常
主雖伯魚稚春不能加焉群從族姻均祿直以賙其乏
不結黨友不趨聲利常欲脩性息跡考一邱之樂而未
齒與位皆負其實奄然不淑爲知者所歎建中初德輿
遇公于九江之西其後辱安平戴侯之知於公護南容

之眷刻石誌美不敢曷辭而實錄焉銘曰
齊稱大風漢有文宗雋賢歲蕤似續昭融坦坦房陵勞
謙孝恭優游祿仕惟道之從素履不華黃裳在中乃儀
列星乃飾伏熊居易處厚有初有終魂氣杳冥諸孤哀
慟圓著大蔡先遠攸同刻茲貞珉永賁邱封

權載之文集卷第二十六

開化圖書館

kaifu library

開化圖書館

Kaichua library



開化圖書館

Kaishua library



開化圖書館

Kaishwa Library

開化圖書館

Wathwa Library

Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17
1 2 3 4 5 6 7

權載之文集

四

開化圖書館
Kathina library

開化圖書

Kaishwa Library



Inches

1

2

3

4

5

6

7

1

2

3

4

5

6

7

8

9

10

11

12

13

14

15

16

17

Centimetres

TIFFEN

Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color